

9. august 2013

UKA 2013/129

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarnissaasa pilersaarusiornissaa siunertaralugu Naalakkersuisut suliassamik piareersaasioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Tunngavilersuut:

Illut imermut attaveqanngitsut sinerissami sumi tamaani suli takussaapput, minnerunngitsumik nunaqarfinni avinngarusimanerusunilu.

Illut kommunit pigisaat soorlu Iserit A/S-imiit aqunneqartut aammalu inuit namminneq illuutaat annerusumik akuleruffigisinnaanngilagut kisianni isumaqarpunga, Namminersorlutik Oqartussat illuutai suli imermut attaveqanngitsut tamarmik attavilersornissaat anguniarlugu iliuuseqartariaqartugut.

Illumik attartornermut aki annikitsuaraanngilaq, imermullu attaveqanngikkaluarpalluunniit aki taannaavoq, taamaammatt pisussaaffeqarpugut innuttaasut inimik illumilluunniit attartortut atugaasa pitsannorsarnissaannut.

Taamaammatt siunnersuutigaara pisortat illuutaat A/S Ini-mik aqunneqartut suli imermut attaveqanngitsut attaveqalernissaasa pilersaarusiornissaa siunertaralugu suliassamik piareersaasiortoqassasoq.

Siunnersuutip allaffissornikkut aningaasaqarnikkullu pisortanut kinguneqaatissai:

Suliassamik piareersaasiorneq allaffissornikkut ukioq ataaseq AC-tut atorfilimmik kr. 500.000-nik naleqartumik suliarineqassasoq naatsorsorneqarpoq. Allaffissornikkut aningaasartuutissat allaffissornermi aningaasartuutissat naatsorsuutaareersut iluanni pingaanersiunikkut naammassineqassapput.

Namminersorlutik inuussutissarsiuteqartunut aningaasatigut allaffissornikkullu kinguneqaatissai:

Namminersorlutik inuussutissarsiuteqartunut aningaasatigut allaffissornikkullu kinguneqaateqassanngilaq.

Innuttaasunut aningaasatigut allaffissornikkullu kinguneqaatissai:

Suliassamik piareersaasiorneq innuttaasunut aningaasatigut allaffissornikkullu kinguneqaateqassanngilaq.